

Pareha homosexual a perde caso pa haya asilo na Hulanda

ORANJESTAD (AAN): Na Hulanda Departamento di Imigracion y Naturalizacion a rechaza categoricamente e peticion ridiculo pa haya asilo cu e pareha homosexual O. y L. a haci na Hulanda.

Na Aruba ya caba e storia di e pareha femenino O. y L. ta conoci y tambe e daño y e mal imagen cu e dos personanan ey a haci na pais Aruba.

E pareha aki, kendenan kier a inscribi nan matrimonio realiza na Hulanda na Aruba tambe, no tabata dispuesto pa respeta y acepta cu na Aruba ley no ta permiti pa matrimonionan di parehanan homosexual worde registra of reconoci.

Esaki e pareha tabata sa di antemano pero muy probablemente nan lo kier a lok uit un asina yama 'proefproces' pero esaki no a duna resultado positivo pa nan.

Riba su mes e intencion di nan pa aparentemente lok uit un proefproces tabata nan

pleno derecho, pero mescos cu bo ta para riba loke bo ta kere ta bo derecho, bo mester por tin e abilidad y grandeza tambe pa respeta y reconoce leynan vigente na cualkier pais y tambe na Aruba.

Ora cu nan no a haya nan gana na prome instancia, nan a bira onsportief y a bay den publicidad negativo contra tur loke Aruba ta encera pasobra e impresion ey a worde crea den publicidad na Hulanda cu e pueblo di Aruba ta contra tur hende cu ta homosexual.

Publicacionnan y declaracionnan haci na Hulanda door di diferente hende cu a bay mete cu e caso particular aki, a pone cu na Hulanda un impresion a worde crea cu e pareha O. y L. tabata biba bao di persecucion y intimidacion di pueblo den su totalidad y te hasta e impresion a worde crea cu e pareha tabata core peligro di morto na Aruba.

Tristo y hopi bergonzoso

den henter e asunto aki tabata cu ministro Marisol Tromp kende lo tabata emplea un di e personanan aki no a sali pa dilanti y mustra cara y defende e pareha.

Mas tristo ta cu na Aruba tin parehanan homosexual ta biba cu otro pa mas cu 45 aña caba, sin problema y nan ta haci esaki publicamente sin cu te awe, te con leu ta conoci, tabata tin actonan di menaza of persecucion contra nan.

Na Hulanda e peticion di e pareha O. y L. a worde rechaza categoricamente pasobra nan tur dos tin e nacionalidad Hulandes y un ciudadano den Reino Hulandes no por pidi ningun sorto di asilo riba territorio

Hulandes mes.

Na momento cu asilo den cualkier forma worde duna na un Hulandes riba territorio Hulandes esaki ta encera cu Reino Hulandes ta mustra mundo henter cu e mes ta admiti di ta persigui su mesun ciudadanonan.

E pareha aki mester a haci manera tur otro ciudadano den Reino Hulandes; sinta warda nan caso den apelacion keda cla pa despues nan rek na som ki pasonan nan lo sigui tuma, pero no manera a worde haci cu nan a core bay Hulanda haci hopi desorden pa haya atencion publico y riba dje crea e impresion cu nan kier a probecha di e situacion cu nan mes a crea pa asina estado Hulandes bay

cria nan pa medio di otorga nan un asilo.

Si e gobierno actual no a atende e caso aki manera mester ta, esaki ta algo totalmente separa di loke ta encera pueblo di Aruba pasobra pueblo no tin nada di haci cu e supuesto persecucion contra e pareha homosexual.

Acusacionnan haci den direccion di ministro di husticia Rudy Croes encuan to cu e ministro aki lo a instiga y te hasta financia campaña y manifestacionnan contra e pareha, ta acusacionnan pisa y te awe ridiculo (mientras no tin prueba!) pa cual e pareha mester bin cu pruebanan duro pa dilanti.